

Kitsissunnguit eqqissimatitaanissaat pillugu Namminersornerullutik Oqartussat nalunaarutaat

Pinngortitamik illersuineq pillugu Inatsisartut inatsisaanni nr. 29-mi 18. december 2003-meersumi § 5, imm. 1, nr. 8-9, § 16, imm. 1, § 39, imm. 6, § 46 aamma § 60, imm. 2, 4-lu malillugit aalajangerneqarpoq:

Siunertaq killiliinerlu

§ 1. Qeqertat ataatsimut taaneqartartut Kitsissunnguit (Grønne Ejland) imarlu eqqaanniittoq Qasigiannuguit Aasiaallu kommuniiniittut eqqaannilu imaq eqqissimatitassanngortinneqar-put. Eqqissimatitsinermi siunertaavoq sumiiffup assigiinngitsunik uumasoaqarluarnerata illersornerata pitsanngorsarnissaa immikkut pingaartillugu imeqqutaallat erniortartut kiisalu qeqertat silaannarissumiifftut pingaarutaat qulakkeerumallugu.

Imm. 2. Sumiiffik tassaavoq Ramsarimi isumaqatigiissut naapertorlugu Ramsarområde nr. 388-itut toqqarneqarsimasoq, tassalu pisortat pisussaapput sumiiffup illersornissaa siuarsassallugu.

§ 2. Sumiiffik eqqissimatitaasoq bilag 1-imi 2-milu nalunaarsimavoq.

Imm. 2. Sumiiffup eqqissimatitap ilaa pingasunngorlugu agguarneqarpoq. Immikkoortoq 1-imiipput sumiiffup eqqissimatitap kitaatungaa ilaallutik qeqertat Saattuarsuit aamma Niaqornaq kiisalu imartaat qeqertaniit 500 meter tikillugu. Immikkoortoq 2-miippoq qiterleq Kitsissunnguit ikkarlullu kangillerpaaq kiisalu imartaa qeqertaniit ikkarlummiillu 500 meterinik avasissusilik. Immikkoortumut ilaavortaaq immikkoortoq 2A. Immikkoortoq 3-miippoq sumiiffup eqqissimatitap kangillersaa ilaallutik qeqertat Innarsuatsiaaq, Kingittuarsuk aamma Angissat kiisalu imartaa qeqertaniit 500 meterit avasitsigisoq tikillugu.

Nalinginnaasumik iserfiginera atorneralu

§ 3. Kikkut tamarmik sumiiffimmut eqqissimatitami isersinnaapput killilersuutit nalunaarutip matuma kingunerisai atorlugit.

§ 4. Sumiiffimmi eqqissimatitami inerteqqutaavoq nunap immallu mingutsinnissaat imaluunniit igitat suusulluunniit maangaanaq qimannissaat, tamatumani ilanngullugit piniutit suusulluunniit, nalunaaqtsersuinerit imaluunniit ilisimatuutut atortut.

Imm. 2. Naasut ajoquseqqusaanngillat nunalu allanngorteqqusaanani. Aamma naasut suulluunniit, naasut sananeqaataasa ilaasa, uumasut, manniit kiisalu meqqut qiviullu katersornissaat inerteqqutaavoq, taamaattoq takuuk § 11, imm. 1.

Imm. 3. Imm. 2-mi inerteqqutaagaluartoq naasunik katersuisoqarsinnaavoq aalisarnermut, aallaaniarnermut piniarnermullu atatillugu nerisassiornermi ikummatissanik.

Tupertorneq innermillu aammaannartumik atuineq

§ 5. Sumiiffiup eqqissisimatitap iluani uninngaarnermi tupertorneq innermillu aammaannartumik atuineq, tamatumani ilanngullugu gassimik spritimillu ikumatitsiviit il.il. atoqqusaanngillat, taamaattoq takuuk imm. 2-5.

Imm. 2. Immikkoortoq 2A-mi tupertorneq innermillu aammaannartumik atuineq, tamatumani ilanngullugu gassimik spritimillu ikumatitsiviit il.il. atorissaat inerteqqutaanngilaq 1. novembarimiit 30. aprilimut.

Imm. 3. Immikkoortoq 2A-mi tupertorneq aamma innermik aammaannartumik atuineq, tamatumani ilanngullugu gassimik spritimillu ikumatitsiviit il.il. 1. majimiit 31. oktobarimut inerteqqutaanngillat, taamaattoq sivisunerpaamik sumiiffimmi ataatsimi ullut unnuallu pingasut. Tupertoqqinneq aamma innermik aammaannartumik atuineq, tamatumani ilanngullugu gassimik spritimillu ikumatitsiviit il.il. atornerat tamatuma kingorna kingornatigut taamaallaat pisinnaavoq sumiiffimmi nutaami ullut unnuallu pingasut sumiiffimmit sioqqullugu atornerartumit minnerpaamik 100 meterinik ungasinnerusumi.

Imm. 4. Imm. 1-imi inerteqqummut ilaanngilaq immikkoortoq 3-mi tupertorneq aamma innermik aammaannartumik atuineq, tamatumani ilanngullugu gassimik spritimillu ikumatitsiviit il.il.

Illuliorneq, sanaartorneq, aqqusineeqqat il. il.

§ 6. Sumiiffiup eqqissisimatitap iluani inerteqqutaapput illuliorneq allanilluunniit nunamut aalajangikkanik sanaartorneq, illut pioreersut ilanerat allanngortiterneralluunniit, kiisalu aqqusinniorneq aqqusineeraliornerlu, taamaattoq takuuk imm. 2-4.

Imm. 2. Immikkoortoq 3-mi komunalbestyrelsi kommuni immikkoortoq 3-p inissisimaffigisaa tusarniaavigereerlugu Attaveqarnermut Avatangiisinullu Naalakkersuisoqarfiup akuerisinnaavaa illuliorneq allanillu nunamut aalajangikkanik sanaartorneq ingerlatitseqqinnermik takornariarnermillu siunertaqartunik. Taamatut akuersinermi Attaveqarnermut Avatangiisinullu Naalakkersuisoqarfiup illunut sanaartukkanulluunniit aalajangersimasunut allanut, suunerinut, inissinnerinut, portussusiinut ilusilernerinullu piumasaasut aalajangersarsinnaavai.

Imm. 3. Sumiiffiup eqqissisimatitap iluani illuaqqat piniariartarfiit ataannarsinnaapput aserfallatsaalineqarlutillu. Kommunimi immikkoortup inissisimaffiani kommunalbestyrelsi tusarniaavigereerlugu Attaveqarnermut Avatangiisinullu Naalakkersuisoqarfiup akuerisinnaavaa nutaanik pioreersut taartissaannik illuaraliorneq. Taamatut akuersinermi Attaveqarnermut Avatangiisinullu Naalakkersuisoqarfiup illuaqqap piniariartarfiup angissusissaanut, suuneranut, inissinneranut, portussusianut ilusilersorneranullu piumasaasut aalajangersarsinnaavai.

Imm. 4. Sumiiffiup eqqissisimatitap iluani immikkoortumi kommunimi kommunalbestyrelsi tusarniaaffigereerlugu Attaveqarnermut Avatangiisinullu Naalakkersuisoqarfiup akuerisinnaavaa aqqusineeraliorneq. Akuersissummi taamaattumi Attaveqarnermut Avatangiisinullu Naalakkersuisoqarfiup aqqusineeqqat sananerannut, tamatumani ilanngullugu atorussat naapertuuttut atornerarnerat, piumasaasut aalajangersarsinnaavai.

Imm. 5. Illuliornermut allanilluunniit nunamut aalajangikkanik sanaartornermut atatillugu kiisalu aqqusineeraliornermut atatillugu nuna naasuilu qangatut pissuseqalersinneqassapput.

Umiartorneq, nunamut niuneq angalanerlu

§ 7. Immikkoortoq 3-mi 1. majimiit 31. oktobarimut inuit angalaqatigiit 12-it sinneqartut pisummik angalanissaat inerteqqutaavoq, taamaattoq takuuk imm. 2.

Imm. 2. Angalaqatigiit 12-nit amerlanerusut angalanissaat Attaveqarnermut Avatangiisinullu Naalackersuisoqarfup akuerisinnaavaa.

§ 8. Immikkoortuni 1-imi 2-milu umiartorneq, nunamut niuneq angalanerlu inerteqqutaapput 1. majimiit 31. oktobarimut, taamaattoq takukkit imm. 2-6.

Imm. 2. Søfartsstyrelsi inulluunniit Søfartsstyrelsip pisinnaatitaa immikkoortoq 2-mi angalasinnaavoq naaralaartitsiviup (raconfyret) nakkutigineranut atatillugu.

Imm. 3. Kommune susassaartoq tusarniaaffigereerlugu Attaveqarnermut Avatangiisinullu Naalackersuisoqarfup immikkoortoq 2-mi angalaarneq akuerisinnaavaa angalaarniat inummik nunatsinni pinngortitamik pinngortitallu illersugaanera pillugu inatsinik ilisimasaqartumik ilitsersorteqarpata. Akuersissummi ilitsersugaalluni angalaneranut piumasaasut aalajangersarneqarsinnaapput, tamatumani ilanngullugu angalaarnerit amerlassusiat, sivisussusiat kiisalu angalaarnermi peqataasut amerlassusiat.

Imm. 4. Immikkoortoq 1-imi 2-milu annanniarluni umiarsualivissittoqarsinnaavoq silap pissusia patsisaalluni tamanna pisariaqarpata. Uninngaarneq Attaveqarnermut Avatangiisinullu Naalackersuisoqarfimmuut nalunaarutigineqassaaq kingusinnerpaamik uninngaarnerup naanerani qaammatip ataatsip qaangiunnerani.

Imm. 5. Immikkoortoq 2A-mi umiarsualivissillunilu angalaartoqarsinnaavoq niuneq kujammut sammernani pippat.

Imm. 6. Immikkoortoq 1-imi aalajangersakkanut ilaanngillat annaassiniarneq ujarlernerlu.

§ 9. Sumiiffup eqqissisimatitap iluani motorilinnik cykelinillu angalaneq inerteqqutaavoq.

§ 10. Sumiiffik eqqissisimatitap qulaallugu 500 meter ataallugu qutsissusilikku timmisartornerit inerteqqutaapput sumiiffup uumasui pillugit, taamaattoq takuuk imm. 2.

Imm. 2. Imm. 1-imi aalajangersakkanut ilaanngillat annaassiniarnerit ujarlernerillu.

Piniarneq, aallaaniarneq, mannissarneq aalisarnerlu il.il.

§ 11. Immikkoortoq 1-imi, 2-mi 3-milu piniarneq, aallaaniarneq, mannissarneq aalisarnerlu inerteqqutaapput 1. majimiit 31. oktobarimut. Aalisarnermut sakkut, tamatumani qassutit ilanngullugit, peerlugillu nassarneqassapput 1. maj tikitsinnagu, taamaattoq takuuk imm. 2.

Imm. 2. Immikkoortoq 2-mi 3-milu nipisanniartoqarsinnaavoq 1. majimiit 10. junimut. Aalisarnermi atortut, qassutit ilanngullugit, peerneqarlutillu nassarneqassapput kingusinnerpaamik 10. juni.

Imm. 3. Sumiiffup eqqissisimatitap iluani aalisakkat sinnikuisa iginnissaat inerteqqutaavoq.

Aqutsineq, nakkutilliineq immikkullu akuersineq

§ 12. Kommunalbestyrelsit susassaartoq tusarniaavigereerlugit Attaveqarnermut Avatangiisinullu Naalackersuisoqarfik sumiiffup eqqissisimatitap aqunnissaanut pilersaarusiussaaq.

§ 13. Kommunip susassaartup nalunaarutip matuma malinneqarnissaa isumagissavaa. Aalisarnerup, aallaaniarnerup piniarnerullu aqunneqarnerat Aalisarnermut, Piniarnermut Nunalerinermullu Naalackersuisoqarfup isumagisassaraa.

§ 14. Attaveqarnermut Avatangiisinullu Naalackersuisoqarfik § 5, imm. 1-imi, § 6, imm. 1-imi, § 8, imm. 1-imi, kiisalu § 9-mi aalajangersakkanit allaasumik akuersisinnaavoq tamanna eqqissisimatitsineranut anguniakkanit allaanerunnigippat.

§ 15. § 4, imm. 1-2-p, § 5, imm.1-ip aamma imm.3 pkt.2-p, § 6, imm. 1-ip, § 7, imm. 1-ip, § 8, imm. 1-ip, § 9-p, § 10, imm. 1-ip, § 11, imm. 1-imi. imm. 2-mi pkt 2-p aamma imm. 3-p unioqqutinneqarnerat akiliisitsinermik kinguneqarsinnaapput.

Imm. 2. § 6, imm. 2-4, kiisalu § 8, imm. 3-mi piunasaasut unioqqutinneqarnerat akiliisitsinermik kinguneqarsinnaavoq.

Imm. 3. Suliffeqarfik naalagaaffimmit, Namminersornerullutik Oqartussanit, kommunimit kommunilluunniit ataatsimoortunit tamakkiisumik ilaannakortumilluunniit pigineqartoq, kommunalbestyrelsit nunaqarfimmilu aqutsisut il.il. pillugit inatsisartut inatsisaannut ilaasut, aktieselskabi, anpartsselskabi assigisaalluunniit unioqqutitsisuusimappat eqqartuussisarneq pillugu suliffeqarfik il.il. akisussaatinneqarsinnaavoq. Taamaaqataanik atuuppoq unioqqutitsisuusimappata Namminersornerullutik Oqartussat, kommuni imaluunniit kommunit ataatsimoortut kommunalbestyrelsit nunaqarfimmilu aqutsisut il.il. pillugit inatsisartut inatsisaannut ilaasut.

Imm. 4. Imm. 1-3 malillugu akiliisitsissutit Landskassimut nakkassapput.

§ 16. Nalunaarut 1. maj 2008-mi atortuulissaaq.

Namminersornerullutik Oqartussat, ulloq 17. april 2008

Kim Kielsen

/

Steffen Ulrich-Lynge

Ilanngussaq 1

Ilanngussaq 2

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut